



ATASSUT

UPA14/127-1

Knud Kristiansen

27.03.2014

Uunga siunnersuut: Suliffeerunnermi ikiorsiissutit pillugit Inatsisartut inatsisaat nr. xx, xx 2014-imeersoq.

(Inuussutissarsiornermut Aatsitassanullu Naalakkersuisoq)

Matumani suliffeerunnermi ikiorsiissutit pillugit Inatsisartut inatsisissaattut siunnersuut saqqummiunneqartoq imatut ATASSUT-mit oqaaseqarfigissavarput:

Inatsisissatut siunnersuut matumani saqqummiunneqartoq annertunerusumik maannakkut suliffeerunnermi ikiorsiissutit pillugit Inatsisartut peqqussutaannut 2006-meersumut uteqqiineruvoq, taamatulli maannakkut inatsisissatut saqqummiussinissaq Naalakkersuisut pisariaqarsorilersimavaat paasinarsisimammat maannakkut peqqussut atuuttoq assigiinngitsutigut naapertuutinnigisoqartoq paasinarsisimammat, tamannalu ATASSUT-mit paasilluarparput aaqqinneqartariaqartoq piaartumik.

Taamatut inatsisissatut siunnersuutip maannakkorpiaq pisariaqalerneranut paasinarsisimavoq inatsisip maanna atuuttup iluani aalajangersakkani danskisuuata aammalu kalaallisuuata nutserneqarsimanerani naapertuutinnigisoqartoq, tamannalu ATASSUT-miit assut ajuusaarnartutut nalilerparput. Taamaattumik manna iluatsillugu ATASSUT-mit Naalakkersuisunut kaammattuutigissavarput tamakku siunissami sapinngisamik eqaannerusumik aaqqiiffigineqarsinnaasalernissai anguniarlugit Inatsisartut siulittaasoqarfiat peqatigalugit qulaajaanissamik ingerlatsinissaat eqaannerusumik aaqqiissutissanik suliaqarnissaq siunertaralugu.

ATASSUT-mit iluarisimaarparput Inatsisissatut siunnersuutip tusarniaatigineqarneranut atatillugu susassaqartuni assigiinngitsuneersut qisuariaatai ilaatigut matumunnga siunnersuummut ilanngunneqarsimaneri, ilaalu kingusinersukkut suliffeqarnermut inatsip tamakkiisumik nutarterneqavinnissaata suliarineqarnissaanut ilanngunneqarsinnaasutut nalilersimammatigit.



Matumani siunnersuummi aamma erseqqissarneqarpoq, suliffeqanngitsut imaluunniit suliffimmiit suliunnaartitaagallarsimasut, utaqqiisaarutaasumik piffissami sivikinnerusumi suligallarnissamut periarfissaqarnerat, suliffeerunnermi ikiorsiissutinik pisinnaatitaanertik annaanngikkaluarlugu, tamannalu ATASSUT-ip suliniutiguartagaannut tassalu imminut pilersorsinnaanissamut naapertuuttuummat iluarisimaarparput.

Taamatuttaaq aamma iluarisimaarparput inatsisissatut siunnersuutip kapitalit tallimaanni suliffissaaleqisup iliuusissatut pilersaarusiunneqartalernissaanik ersarissumik piumasaqalerneq, taamaattorli ATASSUT-mit Naalakkersuisunit paaserusupparput tamatuma Kommuninut annertunerusumik suliakkiissuteqalernissaannik aningaasatigut qanoq kinguneqarnissaa aaqqiissuteqarfiginiarneqarnersoq.

ATASSUT-miit pingaartipparput inatsisit allangortinneqarnerisigut kommunit aningaasaqarniarnikkut sulisoqarniarnikkullu ilaatigut ilungersunartorsioreersinnaaqisut aamma qaavisigut artukkorsorneqarnerulinnginnissaat innuttaasut kiffartuunneqarnerinut allaat kinguneqalerluni aammalu inatsisit naapertuuttumik atuutsinneqarsinnaanerinut allaat innarliisoqannginnissaa ATASSUT-mit kissaatigigatsigu.

Suliffissaaleqinerullu piaartumik iliuuseqarfiginissaa pillugu, ATASSUT-miit aamma suleqatigiinnit Naalakkersuisut piaartumik suliniuteqarnissaat pillugu piffissami kingullermi piumasaqarpugut. ATASSUT-miillu neriulluarfigaarput, piffissami tullermi pitsaasumik tamanna sunniuteqassasoq.

Taamatut oqaaseqarluta ATASSUT-mit kissaatigissavarput innersuussutigalugulu Naalakkersuisunut apeqqutitta akissutissaa ilanngullugu inatsisissatut siunnersuutip aappassaaneerneqannginnerani Inatsisartut ataatsimiitsitaliaannut susassaqartunut suliassanngorluni ingerlateqqinneqarnerani ilanngullugu suliarineqarumaartoq.